

Stichting Stellingwerfs Eigen

Grindweg 18
8422 DN Nijeberkoop
Tel.: 0516-451038
Postgiro: 49 08 902
KvK nr. : 01 104714
Fiscus (ANBI): NL8135.89.769.B01
www.stellingwerfs-eigen.nl

**An et Bestuur van de stichting
Stellingwarver Schrieversronte**
Dhr. Y. Dijkstra (vz.)
**Willinge Prinsstraat 10
8421 PE Oldeberkoop**

Datum: 20 feberwaori 2009.
Betreft: Jow brief van 10/2.

Beste heer Dijkstra,

Mooi, daj'm even de tied vienen konnen om oonze ontmoeting van 10 december 2008 in jim bestuur te bepraoten en oons bi'j brief van 10 feberwaori tiedinge te doen van jim beviengings daorover. Daank daorveur.

Jow richten je in die brief nogal op een persoonlike toon naor mi'j toe. Hoewel de brief naemens et bestuur van de Schrieversronte (sSr) schreven is, richt ik mi'j ditkeer dan toch ok mar wat meer persoonlik naor jow toe, mar et gaot vanzels et hiele bestuur wel an.

Doe 'k de brief veur de eerste keer deurleesd hadde en eerdere korrespondeensie - waaronder jow veurige brief van 31 oktober - d'r ok nog es bi'jpakte, was mien eerste gedaachte: de beste man kan mar min naor een aander luusteren en hi'j is ok an een ni'j brillegien toe want et lezen wodt ok al hadde minder. As hi'j mi'j dan ok nog es woorden zeggen lat die beslist niet over mien lippen kommen binnen, dan kan en wil ik niet iens mit zoe'n man - en die zien klup - saemenwarken. Et het daenk' niet zovule nut om hier now nog es weer alle details bi'jlanges te lopen mar jow haelen mit grote regelmaat mien kritiek hebben (lees: betrokkenhied tonen) deur de war mit jow stelling dat ik gien respect hebben zol veur et wark van de sSr en al heur mitwarkers, en jow numen dat een 'vechtholing'. As ik in alle eupenhied en eerlikhied een meugelike visie van mi'j op 'e bodden legge dan zien jow dat drekt mar as 'anvalen' wodden. En bi'jglieks et stokkien dat jow mi'j persoonlik anrekenen over de auto van de direkteur in Berkoop - wat jow anhaelen uut et jannewaorinommer van 'An de liende' - was niet van mien haand. Bi'j disse peer veurbeelden wi'k et hier now mar even laoten. Jow overwegings dat et belang van et Stellingwarfs en de Stellingwarven centraol staon moeten bin mooie woorden mar blieken niet uut je daoden, - veur zoveer die mi'j an gaon -.

Over et - neffens jow - eerste konkrete onderwarp van saemenwarking (de Biebel in een Stellingwarfse vertaeling) kuwwe now dan ok kot wezen. In et begin het oold-direkteur Pieter Jonker al es angeven dat hi'j dat niet zo zitten zag en het destieds alderdeegst een negatief advies naor de Gemiente toe uutbrocht. Veurig jaor het de ni'je direkteur Sietske Bloemhoff

wat malle zegd over veurweerden en zo veerder, en now beginnen jow nog es opni'j over een 'kwaliteitsprotokol'.

Die vertaeling ligt onderdehaand klaor, de kwaliteit is beoordeeld (en daor mit glorie deurhenne kommen), de centraosie is rond, offertes bin anvraagd en vandaege of morgen wodt et wark van drokken en bienen dan ok anbesteded. Ondaanks et negatieve advies van de sSr (PJ) hebben de beide Gemienten en de Perveensie et belang veur et Stellingwarfs van disse vertaeling - vanzels - wel inzien en doen dan ok graeg mit...

Jow hechten d'r an da'k je even weten laoten zal a'k de opvattingen van et bestuur van de sSr diel op et punt van gedrag, respekt en erkenning as basis veur een toekomstige saemenwarking. Ja, ik erken zonder veurbehoold al et goeie wark dat de Schrieversronte deur de jaoren henne daon het en - hoewel et meerste gewoon goed betaeld wark was - he'k daor ok zondermeer een protte respekt veur. Mar ik vertikke et ten ienen maole om mien kritiek an te passen an de greenzen zoas jow die veur mi'j mienen stellen te kunnen of alderdeegst ofdwingen mienen te kunnen. Zolange ik mien da'k nog aorig binnen mien eigen greenzen blief en meer anvieterings as rappelementen daaromtrent krieg, zie ik et perbleem dan ok niet. Weerleg mien kritiek mit argementen en we kun lichtkaans de grootste kammeraoden van mekeer wodden. Ik vien ók niet dat alle voegelties altied lieke mooi zingen mar ja, ieder voegeltien zingt now ienkeer zoas...

Dat jow je mien kritiek (lees: betrokkenhied) as ontoelaotber gedrag antrekken vien ik getugen van een slecht inkasseringsvermogen en ik veurspelle je dan ok nog een muulike kommende tied now - neffens mi'j toestuurde infermaosie - de eerste subsidie (TOS) al sneuveld is en Henk Bloemhoff gien vaaste mitwarker van de sSr meer nuumd wodden mag.

D'r gaon trouwens geruchten dat d'r bijkotten een Kienderbiebel van de haand van Martin Oostra deur de sSr uitgeven wodden zal. Kiek, dat zol ik now mit recht een misselike streek vienen die veer over mien greenzen van ontoelaotber gedrag gaot omreden ik al een peer jaor leden reupen hebbe dat dat een volgend projekt van mi'j wezen zol, en vanzels he'k gaondeweg et vertaelen van de Biebel de meerste verhaelen daor dan ok al veur klaorliggen. Mar goed, et zullen geruchten wezen die nargens op slaon...

Bij slot van zaeke. Et is niet mien gewoonte om altied mar van alles in achterkaemerties te bedisselen en de minder positieve zaeken dan mar onder de pette te hollen, dat ik neudig je bi'j disse ok graeg uut om tegere mit mi'j een soort van een slotverklaoring op te stellen die we beide in oons eigen periodiek blad (Ovend en Liende) publiseren kunnen zodat meer meensken kennis nemen kunnen van oonze verschillen van inzicht. Eupenhied van zaeken en eerlik - ok naor buten toe - kommuniseren is neffens mi'j ok in et belang van et Stellingwarfs en de Stellingwarvers en daor wowwe mittenneer vaeks starker van.

Mit een vrundelike groet,
Piet Bult

PS

We hebben eerder al es vraogd as de sSr ok een financiële bijdrege beschikber het veur oons projekt van de Biebel. Kuwwe nog een mooi bedrag van jim tegemoet zien mit as tegenprestaosie dat jim naeme mit logo ok nog nuumd wodt onder de begeunsigers veur wat de centraosie anbelangt?